

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

24 Janvier 2020

28 Jamadi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

La Promesse d'Allah au Prophète & à bane Croyants (Pt.3)

Par la grâce d'Allah, c'est Allah (swt) même ki donne moi sa *Tawfiq* là pou mo explique sa sujet là plisse en détail pou ki dans sa siècle ou pé vivre là, ou pas capave dire ki ou pas fine gagne le message et personne pas fine donne ou explication, ou éclaire ou lors sa sujet là.

Donc, moi comme le Khalifatullah de sa siècle là, mo faire travail ki mo bizin faire, et c'est Allah ki guide et dirige moi pou donne sa message très important là kot demain kan ou pou présenter devant ou Créateur ou pas capave dire ki ou pas conne nannié, ki « *personne pas fine dire moi, mo pas ti gagne le message* », sa ou pas pou capave même dire ou Créateur ! Mo faire mo travail ki Allah (swt) fine donne moi, d'après l'instruction divine et ou maintenant, ou prend ou responsabilité si pas ou accepter ou sois ou rejette le message ou sois ou tourne le dos avec le message divine. Sakaine pou responsable pou so action, le jour ki pou ena pou présente devant le Créateur, sakaine ena pou rende so compte. Dans sa le monde ici-bas là, nous tous nous ene voyageur ici, nous temporaire ; alors

nous bizin pense un peu l'au-delà, parski c'est sa la vie après la mort là ki pou permanent pour nous.

Maintenant mo cite ene verset ki trouve dans Surah An-Nur même, Chapitre « La Lumière » (24 : 56), Allah dire: « **Li va renforcé zot religion ki Li fine content donne zot** ». Pareillement dans Surah Al-Maida (5 : 4), Allah fine dire aussi : « **Aujourd'hui Mo fine complète pour zot, zot religion, et Mo fine parfaire Mo faveur lors zot, et Mo fine choisir l'Islam pour zot comme religion.** »

Sa veut dire ki Allah (swt) pou mette et faire ene annonce définitive ki l'Islam pou gagne la force et l'honneur à travers le system béni ki Allah (swt) fine établir, kot Li pou continuer envoie So faveur divine, So Serviteur Choisi, So Khalifatullah kot à travers So Élu (à travers So bane Élus), Li (Allah) pou faire sa religion de l'Islam là gagne la victoire dans le monde entier. Pareil couma mo fine explique ou dans mo deux Khutba ki mo fine faire deux vendredi de cela, kot le Saint Prophète (saws) fine vine plante sa la grain de l'Islam là, et alors bizin ena ene continuation de sa travail ki sa l'homme noble et parfait, c'est-à-dire, Hazrat Muhammad (saws) fine semer là. Li fine sème la grain de l'Islam et azordi ki fine arriver ? Ki fine arrive bane musulmans ? Kot sa bane vrais l'enseignement de l'Islam fine aller ? Pas pou nannié ki nous bien-aimé prophète (saws) fine dire, et surtout kan le verset du Saint Coran fine révéler kot Allah (swt) dire :

« **Wa aakhariina minhum lamma yal-haquu bihim** »

Et bane parmi zot ki pas encore rejoindre bane premiers. (Surah Al-Jumu'ah 62 : 4).

Sa verset là contenir ene très grand prophétie kot ena capave mette en doute la mission du Saint Prophète (saws) et l'enseignement de l'Islam dans bane derniers temps kan sa bane vraie l'enseignement de Islam là bafouer, et alors là définitivement Allah (swt) pou susciter ene témoin pou sauvegarde sa **Sahih Al Islam** là, (c'est-à-dire, l'Islam dans so l'authenticité). Kan sa verset là fine révélé, Hazrat Muhammad (saws) fine faire bien comprendre sa kot li fine dire: « **Law kaanal imaanu mu'allaqan bith-thurayya lanaa luhu rajulun min haa'ulaai.** » (Bukhari, Kitab-'ul Tafsir).

Et kan li ti dire sa, li ti mette so la main lors z'épaule de Salman Farsi et Salman Farsi ti ene Persan et sa prophétie là ti réaliser dans l'époque de Hazrat Mirza Ghulam Ahmad (as) le Messie du siècle passé et sa prophétie pas fini là même ; li

continuer dans sa siècle là par sa humble serviteur ki Allah (swt) fine élever dans sa siècle là. Sa humble serviteur ki Allah fine élève là, li le serviteur et gardien de la continuation de travail de Nabi Kareem (saws) et aussi ene croyant ferme dans le Saint Prophète (saws) et aussi ene croyant ferme dans Hazrat Massih Ma'oud (as). Pareil couma Hazrat Massih Ma'oud (as) so revendication comme le Messie pas ti capave ene quelqu'un en dehors de l'Oummah de Hazrat Muhammad (saws) et comme sa même sa humble serviteur d'Allah, le Khalifatullah de sa siècle là pas capave en dehors de l'Oummah de Hazrat Muhammad (saws), ni aussi en dehors du Jamaat de Hazrat Massih Ma'oud (as). Donc, pou faire revivre sa vrai l'enseignement de l'Islam là, (sa Sahih Al Islam là) sa Élu là pas capave en dehors de Nabi Kareem (saws) et de Hazrat Massih Ma'oud (as) zot communauté. Li bizin ene suivant bien ferme de sa deux là : Ene li le Khatam-an-Nabiyyine (le Sceau des Prophètes), et l'autre li le *Khatam-an-Khulafa* (le Sceau de bane Califes). Et même Hazrat Massih Ma'oud (as) so venue li sans aucaine valeur sans so l'attachement avec Nabi Kareem Hazrat Muhammad (saws).

Donc concernant sa Hadith ki mo fine fek cité [en haut là] et ki rapporter par Hazrat Abu Huraira (ra), Hazrat Muhammad (saws) pé dire ki même si la foi disparaitre lors la terre alle lors le ciel et bien loin même jusqu'à ene z'étoile ki appelle Surrayya, (mo pé dire d'après sa Hadith kot pé faire nous comprend) kot alors Allah (swt) pou envoie ene quelqu'un ou plusieurs dimounes pou ré-amène sa la foi là lors la terre.

Donc, pense un peu ki kalité la foi, l'enseignement divine pou bafouer par la main de l'homme ki à chaque fois Allah (swt) bizin envoie ene quelqu'un pou faire revivre sa vraie l'enseignement de l'Islam là. Pou bizin ena sa système divine de continuation de bane Élus d'Allah là kot Allah (swt) envoie So Khalifatullah et kot sa pou manifester avec grand splendeur et gloire à travers ene quelqu'un ki Allah (swt) même choisir et envoyer.

« Fa-'immaa ya-ti-yan-nakum-minnii Hudan-faman tabi-'a Hudaa-ya falaa khawfun 'alayhim wa laa hum yah-zanuun ».

N'importe kan ene guide arrive parmi ou depuis kot Moi, bane ki suivre Mo Guide pas pou besoin peur, ni gagne la peine. (Al-Baqara 2 : 39).

Dans ene l'autre verset dans Quran Sharif Allah (swt) dire: « *C'est Li ki fine envoie So messenger avec guidance, et religion la vérité, pou surpasse tous les autres religions, même si bane idolâtres détester sa* ». (At-Taubah 9 : 33).

Donc, li bien clair ki péna pli clair ki sa ki c'est Allah (swt) même ki envoie So Messenger avec ene guidance (divine guidance) kot pou faire revivre vrai l'enseignement de sa vraie religion là, sa religion de la vérité là, le *Sahih* [Al Islam](#).

Ena ene message dans sa deux versets là ki mo fine cité la et aussi ene avertissement ki si zot isole zot de sa system divine là, loin avec Allah So Messenger ki Li envoyer avec guidance, alors pas pou ena aucaine possibilité pou ena kit bénédiction ou progrès et succès divine. Sa aussi li inclu dans sa bane versets ki fine cité là, ki parfaitement claire. C'est parole d'Allah sa. Succès et prospérité pou avec celui ki pou reste dans le cercle de l'Élu ki Allah fine envoyer avec So message et guidance kot pou propage la religion de la vérité. Et celui ki par l'arrogance et l'orgueil pou tourne zot le dos avec celui ki Allah (swt) fine envoyer, li pou alle dans la perte, li pou ene perdant dans sa le monde ici-bas là et dans l'autre monde aussi.

Plisse ki 1400 ans de l'histoire de l'Islam témoigne ki aussi longtemps ki le vraie system de *Khilafat-e-Rashideen* ti là, l'Islam ti pé faire progrès et gagne victoire. Le soleil du succès et prospérité fine coucher, kan bane musulmans ti dépourvu de sa bénédiction là, de par zot bane mauvais actions. Après la mort de Hazrat Muhammad (saws), Allah (swt) ti donne bane musulmans bane tels excellent successeurs, ki fine permette à la communauté musulmane pou alle de progrès en progrès parski bane croyants musulmans ti uni et tini ferme le *Tawheed* et bane l'enseignements de Hazrat Muhammad (saws).

Et pendant sa période de bane Khalifa ki ti guidé par Allah (swt), et ki fine durer environ 30 ans, l'Islam so gloire pas ti seulement établi dans l'Arabie, mais dans tous les coins du monde. Allah (swt) ti promette ene communauté de bane croyants dans Surah Al-Imran (3 : 140) avec ene condition : **« Zot pou certainement gagne le dessus si zot bane croyants »**. C'est-à-dire, zot pou gagne la victoire si zot pas délaisse zot Islam.

En accord avec sa promesse là bane musulmans ti gagne succès et victoires dans tous domaines et dans tous directions. Quand situation après la mort de Hazrat Muhammad (saws) ti bien critique pou Islam, vite après l'établissement du system *Khilafat-e-Rashideen*, le pavillon de l'Islam ti pé flotter dans l'Est de Afghanistan jusqu'à lors frontière la Chine et jusqu'à Tripoli et lors bordure du Nord de l'Afrique de l'Est et dans le Nord jusqu'à la mer Caspien et jusqu'à l'Ethiopie dans

le Sud. Sa progrès et victoire de bane Khalifa guidé et approuvé par Allah (Divine Guidance) fine surprendre le monde jusqu'à même aujourd'hui.

Sa c'était l'époque de progrès de l'Islam même ki bane opposants bien forts ti sans pouvoir pou arrête bane musulmans. Tel était la grandeur de l'Islam et respect pou bane musulmans ki même bane grand l'empire et bane empereurs trembler kan tanne zot noms (bane musulmans) et démontrer ene respect profond devant zot kan zot tend zot noms. La vérité c'est ki dans sa période de bane Khalifa guidé là, l'Islam ti gagne tel grand la gloire et éminence ki même aujourd'hui ene historien impartiale kan li guette sa l'époque là li pou éblouie. Li pas réussi comprend comment bane habitants du désert fine conquérir le monde. Li pas réaliser c'était fruit de bane Khalifa guidés. Voilà kan Allah (swt) envoie So Envoyé avec guidance, kan nous tende li causer (c.à.d., Le Messager d'Allah, le Khalifatullah) derrière li c'est Allah ki pé causer et pé donne bonnes nouvelles à bane croyants.

Mo dire zot: Ô Jamaat de bane croyants! Et bane ki faire bane bon actions! Mo dire zot ki Khalifa choisir par Allah c.à.d., le Khalifatullah, li ene grand bénédiction divine, alors traite li avec respect parski c'est quelqu'un ki Allah (swt) fine envoyer parmi zot et Allah (swt) cause à travers li. Aussi longtemps ki beaucoup parmi zot pou reste ferme lors zot *Imaan* et pou contigner persévérer dans bane bon actions, Allah (swt) pou continuer déverse So bénédiction divine lors zot. Alors pas vine ingrat envers Allah, et Allah So bénédiction divine et pas guette révélations divines avec dégoût [et aussi pas zouer avec révélations]. C'est vrai ki Hazrat Muhammad (saws) et Hazrat Massih Ma'oud (as) fine mort, mais zot la lumière ki Allah (swt) ti envoyer pas fine teigne et zot la lumière continuer éclairer et li continuellement illumine l'environnement de sa le monde là. Li pé guide vers le droit chemin ki pou bane madames et bane hommes. Bane rayons de sa la lumière divine là pé refléter à travers So Khalifatullah. Donc, en abandonnant le Calife d'Allah péna ni la lumière, ni vrai guide.

Alors fine l'heure pou arrête dormi et faire sourde d'oreille. Vini, sorti de bane ténèbres, soleil fine levé. Pas reste dormi même! Ki Allah (swt) gagne pitié de ou et accorde ou la foi. *Ameen Summa Ameen, Ya Rabboul Alameen!*